


Dr. Jusuf Mulić,
ĆUPRIJA HASEĆI ALI-AGE KOLAKOVIĆA U KONJICU,
Knjižara Pelikan, Konjic; izdavači Safet Ebibović Poštar
i dr. Jusuf Mulić, autor; Konjic, 2009.



Rijetko se dogodi da se san ostvari. A, eto, Konjičani su to doživjeli. San o obnovi stare konjičke ćuprije Haseći Ali-age Kolakovića ostvario se. Ponovo je tu, sa svih svojih šest svodova, ogradom i tarihom. Kule su ozdravile, odstranjena su iz njih strana tijela, i sada punom snagom ponovo nose svu ljepotu kojom ih je vješti neimar podario. Niknut će uz nju i stari dućani, pa će se opet popiti dobra bosanska kava u Čar-dagiji.

Hvala profesoru Jusufu Muliću što je 1997. god. pokrenuo priču o formiranju Udruženja za zaštitu kulturnoga i historijskoga nasljeđa i obnovi Ćuprije, hvala Udruženju, Načelniku općine i njegovim suradnicima i svima u gradu koji su doprinijeli da se san oživi, a posebna hvala Republici Turskoj i turskoj vladi koja je omogućila da se san ostvari.

Pitali su me jednom na konjičkom radiju: Što Ćuprija znači za Konjic? Pa sam se dosjetio. Svi znate za Višegrad. Grad iz romana našeg nobelovca Ive Andrića. A roman je *Na Drini ćuprija*. E, sad zamislite Višegrad bez Ćuprije Mehmed-paše Sokolovića. Jedna bezlična istočnobosanska čaršija.

Gradovi uvijek nastaju na posebnim mjestima. A najčešće su to mjesta gdje je ljudska ruka povezala dvije obale. Na mjestu stare konjičke ćuprije, još u rimsko doba prelazilo se preko rijeke na putu od Mora prema unutrašnjosti. Taj put se u vrijeme Osmanlija zvao Mostarska džada. I na toj džadi je Haseći Ali-aga Kolaković 1682. god. počeo graditi novu kamenu ćupriju, nešto malo uzvodno od dotrajale drvene,

koju nekih sto godina ranije sagradi čuveni Hadži Bali iz Mostara. I upravo oko Ćuprije je nastala kasaba Belgraddžik, koja je kasnije, s naseljem Neretva na desnoj obali, formirala grad Konjic.

Bez Ćuprije Konjica ne bi bilo.

U godini u kojoj će biti obilježen svečani završetak radova na obnovi Ćuprije, prof. dr. Jusuf Mulić, na sebi svojstven način, priredio nam je još jedno ugodno iznenađenje. Uz pomoć našega sugrađanina Safeta Hebibovića pripremio je izdanje svoje nove knjige *Ćuprija Haseći Ali-age Kolakovića u Konjicu*. Ovo je prva cjelovita knjiga o Ćupriji. Samo njemu svojstvenom marljivošću, upornošću i neizmjernom energijom, sila prikupljenih podataka pretočena je u djelo, koje ne govori samo o staroj Ćupriji u Konjicu, nego i o vremenu u kome je nastala, obogaćeno mnogim pratećim sadržajima, koji su za nju bili vezani. Tu je Ćupriju na fotografijama, razglednicama, poštanskim i taksenim markama, grbovima i amblemima, ali i na slikama umjetnika, u pjesmama i zapisima putopisaca.

Još jednom veliko hvala prof. Muliću što nam je ponovo podario vrijednu knjigu, koju će svaki Konjičanin željeti da ima u svojoj kući.

Dženan-Dženo Kovačić